

Date – 20/01/2026  
Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Chief Minister Pu Lalduhoman sorkar kal tawhte siam chhuah lêt aia tam ZPM sorkarin kawlphehtha siam chhuah an tum tih a sawi.
2. Lawngtlai Bawrhsap Pu Donny Lalruatsangan Lawngtlai District chhunga dan lo a lo lut leh sumdawng tam lutuk chu ngawihmawh tham a ni a ti.
3. India leh UAE te chuan ram venhimna,vansang zirchianna, energy, supercomputing leh sum peipunna lama thawhdunna tih len an remti
4. BJP Working President Nitin Nabin chu National President thar a ni dawn.

<><><>

### CM

Chief Minister Pu Lalduhoman Union Territory a nih atanga kum 54 chhungin Mizoramin ama pualin kawlphehtha megawatt 10 vel bak siam chhuah a la neih loh thu leh sorkar kal tawhte siam chhuah lêt aia tam ZPM sorkarin kawlphehtha siam chhuah an tum thu a sawi.

Tuirini Small Hydel Project atan Congress sorkar lai kum 2016-ah hmalak tan a nih thu sawiin Pu Lalduhoma chuan, a bul tanna tur US dollar nuai 3 kha MNF sorkarin dawng ngam loin an reh ta vang vang a, ZPM-in Mizoram mamawhna hriaian an thar thawh leh tâ a ti a, he project hi kum 5 chhunga thawh zawh hman an tum tih a sawi a ni.

Chief Minister chuan ram hmasawn ni turin kawlphehtha mamawhna a san thu leh ZPM sorkar chuan Industrial Investment Policy an siam thu sawiin, he policy hmanga Mizorama invenstment rawn ti tur company-te hnenah thil tiam pali - a thlawna ram pek te, kawng siam sak te, tui connection pekte leh power connection pek a nih thu a sawi a; company lianten Mizoram an rawn ngaihven thu a sawi bakah, Mizorama entrepreneur-te thil siam chhuahte chu kawlphehtha mamawh an nih deuh zel thu a sawi bawh a ni.

Tuirini Small Hydel Project atan hian Sesawng rama Tuirini lui chu khuah a ni dawn a; Externally Aided Project hnuaia mi niin, sum ruahman hi cheng vbc 676 leh nuai 98 a ni a, zaa 80 chu sorkar laipuaia Department of Economic Affairs (DEA)-in New Development Bank, Shanghai atanga loan lain a tum ang. Mizoram sorkar chuan sum ruahman zawng zawng atanga zaa 20 cheng vbc 135 a tum ve a ngai dawn a, hetihual hian Mizoramin a tum tur atanga cheng vbc 54 bak zawng hi central sorkarin a peksak dawn bawh a ni.

<><><>

### TUIRINI SHP FOUNDATION

Kawlphehtha megawatt 24 pechhuak thei Tuirini Small Hydel Project (SHP) siamna tur lungphum nimin khan Chief Minister Pu Lalduhoman a phum.

Sesawng ram chhung Tuirini kama din tur he Project atan hian New Development Bank (NDB) atangin loan cheng vbc 676 point 98 puk a ni ang.

New Development Bank duh danin Mizoram sorkar chuan Tuirini SHP enkawltu tur bik Project Monitoring Unit a din fel tawh a; Project Management Consultant rawihna tur tender pawh nikum December thla khan tihchhuah a ni.

Tuirini Project hi kawlphehtha megawatt 24 pe chhuak thei tura ruahman a ni a, kum khatah kawlphehtha unit maktaduai 64.1 a siam chhuak thei dawn a ni.

Chief Minister chuan Loan pung tlem chu Loan tha mi ani tih sawiin a tam thei ang ber puk chu sorkar tha awm dan tur a ni tih a sawi a, Mizorama company lian investment rawn ti leh tur te tan tiam an nei tih sawiin kawng leh tui leh power connection pek an tiam avangin company lian an bengvar sawt hle a ti bawk.

Chief Minister chuan kawlphehtha chhit man an sorkarah a hun zelah an pe a ti a, pek tlai man an chawi loh bakah a hun zela an pek avangin an tlawm thin tih sawiin nikum December thleng khan cheng nuai 657 lai a huna power chhit man an pek avangin an tlawm tih sawiin P&E Department tunhmaa sum senralna ni thin chu sum hmuhnaah an chhuah a ti bawk.

<><><>

ADVISER TO CM

Adviser to Chief Minister Pu TBC Lalvenchhunga’n Lengpui Ram Indian Air Force hnena Hralhna cheng vaibelchhe 187 leh nuai 90 chu sorkar hmasa huna the fel leh tihfel vek tawh a ni a ti a, an sawrkar hnuah sawrkar laipui atanga zangnadawmna pawisa lokal chu an pe chhuak mai tih a sawi.

Nimina ZPM chhung inkhawmah he thu hi sawiin Pu TBC Lalvenchhunga chuan tualchhung chanchinbua senior journalist Pu HC Vanlalruata thu ziah, 'Lengpui Ram IAF Hnena Hralh' tih a lo lang zangnadawmna cheng vaibelchhe 187.90 dawn chungchang chu sorkar hmasa huna tihfel vek a ni a ti a, zangnadawmna pawisa chu sawrkar laipui atanga lokal an sawrkar hnuah pekchhuah ani a ti a, IAF ram lei leh hralh chu Lengpui ram chauh ni lovin Sihphir ram acre 5 a tel tih a sawi bawk.

Pu TBC Lalvenchhunga chuan sorkar hnen thleng loa ram hralh theihna DC 'level'-a a zo vek thei chu mak a tih thu a sawi a, IAF ram lei chu DC 'level'-ah a tawp vek tih sawiin cheng vaibelchhe 187.90 in hralh ani a ti bawk.

<><><>

LAWNGTLAI

Lawngtlai Bawrhsap Pu Donny Lalruatsangan Lawngtlai District chhunga dan lo a lo lut leh sumdawng tam lutuk chu ngawihmawh tham a ni a ti.

Nimina hemi chungchang meeting ah Pu Donny Lalruatsanga chuan Lawngtlai District ah tun dinhmun ah dan lova lut an tam a ti a, Mizoram Home Department atang pawn hemi kawnga hmala tura lehkhah hmuh a nih tih sawiin, he thil ah hian Sawrkar angin hma lak a ngaih mai bakah nakin zel a District leh ram tan nghawng nei tur thil a nih avangin NGO, VC, Police leh force lam te nen a hmalak a ngai a ni, a ti.

Lawngtlaia dan lova awmte chu Zohnahthlak unaute an ni chungin tun atanga hma lak anih loh chuan nakinah a harsa dawn tih a tarlang a ni.

He consultation meeting ah hian Inter-District joint meeting neih nise tih a ni a, a rang thei ang bera hmalak ni se tih a ni.

Consultation meeting ah hian Addl.SP, Dy.Commandant, 20th AR, Sr.Revenue Office, LADC, DCTO LADC, President CYLA, President MJA

Lawngtlai, President, Village Council Associatio, VCP, 3rd IR Battalion, LWA, MHIP, LUP leh MUP aiawh te an tel a ni.

<><><>

HANDHOLDING SCHEME

Mizoram sorkarin hmasawna leh intodelh tum te puihna atana a duan Bána Kaih (Handholding) Scheme thawh hnihna hnuaiah loan component progress partner atana dilna 386 pawm a ni tawh a; Phase-I hnuaia progress partner atana thlan mi 349 hnenah bank-ten loan an pe tawh.

Bána Kaih Scheme hnuaia loan dilna lut hi a kaihhnawih sorkar department-te'n an endik hnuaiah implementing department-te'n recommend list an thehluh atanga a felfai leh pek tlâk ho chu Handholding scheme-a thuneitu sang ber Apex Body-in ngaihtuahin a pawmpui thin a; Apex Body-in a pawmte hi bank-te hnenah an pawmpui tura thehluh leh thin niin, bank-te hian dilna an pawmte hnenah loan an pe chhuak thin a ni.

Mizoram State Policy Coordination Committee (MSPCC) hotute hnen atanga Akashvani News Aizawl thudawn danin, Bána Kaih Scheme thawh 2-na kalpui mekah hian loan component hnuaia progress partner ni tura dilna lut zinga 386 pawm a ni tawh a; Phase-II loan component-ah hian Bana Kaih hnuaia sorkarin a thawhpui bank-ten mi 7 hnenah loan an pe tawh a ni.

Bana Kaih Scheme Phase-II loan component hnuaia loan pek tura dilna pawm tawhte hi Commerce & Industries department hnuaiah 219 niin a tam ber a; AH&Vety department hnuaia dilna pawm tawh 81-in a dawt a ni. Mizoram KVI Board hnuaiah dilna 35, Copperation department hnuaiah 20, Land Resources Soil & Water Conservation department hnuaiah 10, Agriculture & Farmers Welfare department hnuaiah 6, Fisheries department hnuaiah 5, Horticulture department hnuaiah 3, UD&PA leh Tourism department hnuaiah 2 ve ve, Sports & Youth Services department, Information & Communication Technology department leh Science & Technology hnuaiah dilna 1 theuh pawm a ni tawh bawk.

Handholding Scheme Phase-I hnuaia loan component-ah khan Bana Kaih hnuaia sorkarin a thawhpui bank 3-ten mi 349 hnenah loan an pe tawh a; Mizoram Rural Bank-in loan pe tam tawh berin mi 232 hnenah an pe tawh a, State Bank of India-in mi 78 leh Mizoram Cooperative Apex Bank-in mi 39 hnenah an pe tawh bawk a ni.

Mizoram State Policy Coordination Committee-in a tihchhuah 'Progres Partner-te Puitu' tih lehkhahua tarlan danin, progress partner-in loan a lakna atana project a siam chu cheng nuai 50 aia tam lo a nih a, bahlah loa thla tin a rulh bawk chuan Mizoram sorkarin an bana kaih nan an loan pung zawng zawng chu kum chanve (thla 6) danah an mimal bank account pangngaiah a rul lêt thin dawn a; hemi tur hian progress partner-te chuan loan an lak chu bank kalphung angin a pung zawng zawng nen an rulh phawt a ngai thung a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UAE PRESIDENT

India leh UAE te chuan ram venhimna,vansang zirchianna, energy, supercomputing leh sum peipunna lama thawhdunna tih len an remti. Nizan khan India tlawha lo zin UAE President Sheikh Mohamed bin Zayed Al Nahyan leh Prime Minister Narendra Modia te hi New Delhi-a Pu Modia chenna inah an inkawm a. Ram pahnih inkara thawhdunna hrang hrangte sawidunin inremna hi siam a ni.

Puan tawh angina United Arab Emirates President Sheikh Mohamed bin Zayed Al Nahyan nimin tlai khan Prime Minister Narendra Modia sawmna angin India a lo tlawh a. Airport ah Prime Minister Modia hian a lo hmuak a ni. Tun tum hi Sheikh Mohamed an UAE President anih hnua India a lo tlawh vawi thumna a ni.

<><><>

BJP

BJP Working President Nitin Nabin chu National President thar a ni dawn. BJP National Returning Officer DR.K.Laxman chuan BJP National President inthlanna neih turah Pu Nabin-a hming chauh hi chuh tura hming rawt anih thu a sawi a. Vawiin hian National President atana thlan anih thu hi puan a ni ang a ti. Dr.Laxmana sawidanin National President tura nomination paper 37 lut zawng zawngin Nitin Nabin hi an rawt vek tih a sawi a. Nomination paper te hi uluk taka endik anih hnuin dan ang thlapa kalpui anih thu a sawi a ni.

BJP National President JP Nadda, Union Minister Amit Shah, Rajnath Singh, Nitin Gadkari leh Parliamentary Board memberten Nitin Nabin hi an rawt vek a ni.

<><><>